

摘藻堂四庫全書薈要

集部

欽定四庫全書薈要卷一萬六千七百八十八

集部

家藏集卷五十九

明 吳寬 撰

傳四首

侍郎黃公傳

公諱孔昭字世顯姓黃氏唐末有諱緒者為昭武鎮都
監避亂自閩中徙家台之黃巖後其地割為太平故今
為太平人所居洞山更數世族益大人稱洞黃曰與莊
有善行生禮遜號松塢尤邃于學以剛介好古聞鄉里

禮遜生瑜兵部職方主事賢名甚著瑜生公二世並以公

貴贈南京工部右侍郎公年十四遭職方公與母夫人

金氏相繼下世自京師扶柩返葬哀毀骨立人已謂黃

氏有子既長執友建寧守賀浚知其賢舉為松溪訓導

不果公歎曰士之出仕乃藉人舉薦耶慨然誓取科第

以世其家樓居讀書刻苦特甚至忘寢食及入邑學家

貧乏資給而學益力遂中鄉試天順庚辰登進士第初

授工部屯田主事同官有貪污廢事者與公不合以計

擠之無所得而公之名因起其人既被黜公獨署司事
事悉舉而宿弊盡革時適議慈懿太后山陵公憤其事
曰治葬吾職也亟草奏疏將上而朝廷竟從衆議乃已
尋擢都水員外郎郎署無故例不得改調吏部以公賢
而工官非宜特奏改文選命下皆以為宜後擢郎中公
持選法最慎汲汲以人才為慮嘗曰國家之用才猶富
家之積粟粟積於豐年乃可以濟饑才儲於平時斯可
以濟事自頃人矯激沽名以閉門謝客為高天下人才

何由知之故公退客至輒延見詢訪有所得必書于冊
往往量其才隨其地參之輿論薦于天官卿用之務使
用之各當其才雖小官卑職亦不敢忽或因勢家干請
欲私用其人輒力言其不可時既不能盡沮後其人多
自敗衆始服公之正凡在文選者十五年擢通政司右
通政專清武職貼黃又三年始擢南京工部右侍郎于
時工役不息屢假私錢以給材用歲久多所逋負公至
以提舉等司隙地皆為豪強侵占奏復之以收其利公

署毀于火且重建一新方漸革諸弊一如屯田時而公
俄以疾卒矣享年六十四公清介有守自舉進士已有
廉名及授秩以公事之江南雖鄉人之仕其地者以尺
帛來餽亦卻去後同考會試有勢家子暮夜持百金私
謁叱之不容見然終不言其人其處公事必盡其力非
特無私而已終身儉素雖老且貴如未仕時至待宗族
獨不計惜嘗以舊居悉讓其弟以女弟貧乏斥俸令養
之凡親友患難疾病必扶植乃已尤不妄交游故布政

使陳公士賢令祭酒謝公鳴治皆鄉人之卓然者獨以道義相好若刑部侍郎林公一鶚既沒念其子孱弱為經紀其喪復輯其事行傳之後奉詔得薦舉異才以今應天府尹樊公廷璧福建按察僉事致仕章公德懋奏二人蓋公素所賢者士論以為得人平生好學不倦公暇輒手一冊日求古書多自校正更輯鄉里前輩文詞為赤城論諫錄并赤城詩集板刻行世其所自著質實而理勝有定軒集若干卷定軒者公之別號也娶淑人

蔡氏生子三備工部營繕主事居官有父風次挺佐皆
早卒孫五紹繹綰約紛既卒朝廷遣官祭葬如卹典而
綰以例為國子生寬幸文公營繕君因以公平生為託
乃撰次如右而復論之曰周禮太宰之職掌建邦之六
典蓋兼六卿之事無所不掌者也後世特以選舉為務
其屬分任于下為部凡四其職可謂專矣而文選尤為
要秩使其人不賢雖有賢太宰不能獨治百官由之不
得其人此其所以為要也昔毛价仕魏為東曹掾所舉

皆清正之士能以儉率人一時士皆以廉節自厲令觀公之為人蓋亦近之後雖超遷惜其卒以工官而去雖有知者薦為已助而竟不用是可歎也夫价仕非其時君子惜之予聞正統間黃巖有李茂弘考功靜退有守君子人也其名至今不衰公嘗慕而稱之以追其遺風孔子曰魯無君子者斯焉取斯其是之謂歟然則公之子孫視此其能嗣公也哉

布政使陳公傳

公諱選字士賢姓陳氏台之臨海人也其先出東陽為
宋國子司業左輔之後元初徙僊居再徙臨海曾祖澹
圭祖泰生贈文林郎廣東道監察御史父員韜為御史
出巡福建活沙寇脅從者數萬人表然有名卒官福建
右布政使後贈正奉大夫正治上卿娶夫人金氏以宣
德四年十一月二十八日生公于台之文肅坊故第公
少則沉靜端慤不妄言笑稍長從鄉先生陳僉憲璩游
日坐一室誦習未嘗嬉戲敝衣糲食人不堪其清苦而

處之自如為文平雅若不以詞尚而理致深密讀之有味識者已知其為德者之言也景泰元年以禮經中浙江鄉試天順四年會試第一人遂登進士第初授山西道監察御史才識已著凡大獄當議者都御史必咨以取平出巡江西風紀大振雖不以刑法立威官吏相戒自不敢犯俄廣蠻流劫贛之龍南督兵勦捕遂平之歲滿還朝適憲宗嗣位向用言官益思獻納時有詞臣二人嘗被謫調者將謀復用公上疏言君子小人進退治

道所繫不可不慎言甚剴切竟沮其謀他所彈劾者尚
多其人自是直名聞天下然亦為人所忌矣乃始出提
學南畿至則以學者不務實行而競為浮華之文以取
科第力欲變其故習徧歷郡縣居宿學宮默然端坐以
身為教至竟日不施朴刑第其文必以理勝為主且先
令讀小學書暇輒習冠祭禮一時諸生翕然感化或有
過被責一言深自愧赧若無所容論者謂自廬陵孫先
生之後繼之者公而已秩滿擢河南按察司副使初治

軍政朝廷以公提學之善也復以命公公為教大率如
前日而充養益深中州學者皆自以為得師其氣象加
宏裕矣凡八年遷按察使父老素知公賢及是至自外
郡皆焚香迎拜道旁曰我輩有福矣公既視事首釋繫
囚為立約而去諸宿弊一切罷革專以簡易為治吏卒
斂手雖同官亦竦然謹畏未幾聞繼母沈夫人喪士民
爭泣送城外去而益思之有為肖象立祠者服除赴吏
部特擢廣東右布政使踰年轉左公念廣民疲因為除

徭役罷和買備賑濟皆為惠養計數辨冤獄閩人賴克

壽等三十九人漁于海舟為風漂至潮州守者獲之坐

以通番罪其人以苦訊誣服又邑民劉馬住及黃福等

十九人被誣為盜公察其冤悉釋之尤不畏貴倖中官

有弟冒為武職者逼娶寡婦為奪還之於是又有提督

市舶司者倚進貢為奸利役戶苦於供需特為奏減三

十人其後番人馬力麻與海商私通販易詭稱蘇門答

刺國使臣市舶利其貨不問公發其偽謂如不得已姑

納其方物留其人即此賞勞庶免緣途供饋亦絕其後
私通之弊時又有撒馬兒罕使臣怕六灣自甘州以獅
子入貢將取廣南浮海還國云欲從滿刺加更市獅子
公言此獸何用於世彼西域賈胡為圖利耳使墮其謀
必貽安南諸夷之笑國體所關甚非細故中官既蓄減
役戶之怨且素利進貢及是每為沮抑怨益深乃誣奏
公他事勘問者求事實不得必欲文致以罪竟逮公赴
京廣人數萬號泣擁留之公行至南昌以病卒成化二

十三年五月二十一日也年五十八故人張翰林廷祥
為治歛具而歸其喪于家士大夫聞而悲之公立志以
古聖賢自期潛修默識不求人知其學以克己求仁為
要因以克菴自號讀書不資於文詞遇格言即手錄于
冊以為力行之助而寤寐儒先特取宋史道學傳刻印
以傳學者平生言若不出諸口視所當為者勇於為之
不顧利害其處事緩而詳御下嚴而恕至於言動端莊
雖家人見其終身然也身既貴顯燕會惟服先人故衣

帶客至瓦器蔬食懽然無愧色自河南聞喪還行裝蕭然牛車一兩而已及之官廣東騎驢出都門而去其儉約有寒士所不及者元配王氏贈孺人繼張氏皆有婦德子男四曰藩曰翼皆早卒曰戴曰慮二女孫男一女一戴賢而有父風初公倣范文正公置田百四十畝以充祀先周族之用號思遠莊及卒後族人以公無遺貲舉田還戴戴不可曰先人置此凡以行義也戴取而私之獨無愧乎况治命又嘗俾勿廢此乎人謂公有子公

沒之明年今天子改元弘治庶政一新工部主事莆田
林沂為公理前事上言陳某清介正直有古人之節居
官力為朝廷布宣德澤惟恐不至天下想望其風采冀
其大用乃為小人誣陷以死當為昭雪下大臣議咸以
沂言是宜復其官俾其家禮葬之為人臣激勸賴天子
明聖即詔有司如所議行公之葬其知友祭酒謝公既
為銘而工部侍郎黃公復為行述足以傳世矣寬念自
為諸生辱公知愛今幸承乏史氏可無紀載乃謹為公

傳以歸于戴藏于家云贊曰

昔之大儒以道學名者其學必適於用如晦菴朱子尤
可考見觀其撫民之方事上之道攻邪之論處變之才
確然可法蓋必如是而後謂之道學也然當其時小人
猶以偽學指目況後世乎夫後世迂腐矯誕之徒乃真
其人顧以道學自處其誰許之如陳公之學適於用者
如此顧其所立有過人者雖不以道學名而君子則自
許之若其罹讒謗遭禍患古之聖賢所不能免於公乎

何損然則有感於世道者雖為公釋然可也

倪文毅公家傳

公諱岳字舜咨姓倪氏其先從宋南渡家于錢塘國初
詔徙江浙諸省民實京師公之高祖啓在徙中故今為
上元人自啓以下三世皆未顯至公之父謙在英宗之
世始以進士及第入翰林仕至南京禮部尚書卒贈太
子少保謚文僖文僖嘗奉命祀北嶽其配姚夫人夜夢
緋袍神人入室寤而生子文僖以為嶽神所感也因名

其子曰岳即公公生而瓌碩迥異常兒性更孝姚夫人沒時年甫七歲居喪哀而盡禮弔客歎異幼即知向學業文之餘兼通吏事偶有羣吏將赴吏部試戲出獄詞為題令剖斷旁觀者曰此老吏筆也識者已知公他日非特以文名者文僖以翰林學士主順天府鄉試為怨家中傷謫戍宣府公從行患難中學業益勤既長文僖擇日筮賓為行冠禮邊人環觀歎羨自是習行之天順壬午以宣府學生鄉試中式甲申登進士第年二十一

選為庶吉士績學翰林預修英宗實錄成化乙酉始授
編修實錄成加俸一級先是文僖用詔恩復學士一時
父子同在翰林人以為榮後文僖擢南京禮部侍郎致
仕家居公乞歸省因過錢塘展墓還任乙未秩滿進侍
讀明年選充經筵講官於是文僖再起為尚書仍以疾
致仕公再乞歸侍竟遭喪服除還任適令上為皇太子
講學春宮詔輯文華大訓內閣大臣首以公名上壬寅
書成進學士甲辰充春宮講讀官丙午擢禮部右侍郎

仍命經筵進講弘治戊申為今上即位改元之歲進左
侍郎癸丑拜尚書丙辰俄加太子少保改南京吏部尚
書己未再改兵部賜敕叅贊機務明年始召為吏部尚
書兼太子少保如故公狀魁岸目光炯炯袍笏偉然望
之如神天資明睿為文敏捷若不經意初在翰林凡考校
纂修綽有餘力每進講上前以古義附時事為勸其言
剴切而音吐洪暢人擬之范祖禹上屢屬目始有大用
意及在禮部遇事如素習無難易即治累遇行大禮凡

載於儀注者既多贊相合禮若國朝自德祖以下九廟已備及憲宗山陵禮畢神主將升祔於制當祧廟下禮部集廷臣議或以德祖以下四廟以次當祧至太祖為百世不遷之祖公以此說固所以尊太祖然豈太祖崇本尊親之意哉故周既追王太王王季又上祀先公以天子之禮其意蓋出於此國家自德祖以上莫推其世則德祖乃周之后稷也不可祧懿僖仁三祖以次當祧至太祖太宗為周之文武百世不遷今憲宗升祔當祧

懿祖一廟宜於太廟寢殿後別建藏祧主之所如古爽
室之制每歲暮則奉祧主合享亦應古祫祭之制時又
有言孝穆太后當祔廟者復詔議之公言周之姜嫄為
帝嚳次妃后稷之母故周禮有享先妣樂舞蓋指姜嫄
而魯頌閟宮之詩特見其名此別廟之明證也且唐宋
以來皆有故事可考如奉慈殿是已今孝穆神主宜於
奉先殿旁別立廟歲時祭享悉如奉先殿之儀知禮者
皆以其言為然奏上詔悉從之二疏蓋皆出公手云時

今上初元慨然欲新庶政公與同官協心輔政首革淫
祠正神號將舉宿弊盡除之建言者因及孔廟從祀諸
賢亦宜改正公言漢儒專門六經轉相傳授煨燼之餘
賴以不墜其間諸儒立身不無可議能傳經之功自不
可泯故自唐以來列于從祀彼七十子名字載於遷史
已久又何必以區區臆見追論於千百年之後哉遂格
不行未幾尚書耿公自南京召至適以災異求言公偕
上七事又以八事繼之大率勸上躬節儉以先天下言

今天下奢靡成俗財匱民窮惟從所好而已且天下之
土地有限而宗室之分封益增百年後又將何以處之
宜以時減殺又近歲額外設官頗濫凡所供給皆出於
民民安得不困宜以時裁革公嘗以所當言者尚多不
能專主為恨及拜尚書適京師有大雨雹之變即上言
天之告陛下至矣蓋變不虛生宜深求其故以回天意
可也又勸上勤講學開言路黜奸貪進忠直止無功之
賞停不急之役番僧惑世以異術售不宜復召而來賈

胡邀利以夷獸進宜卻而去故事四方奉報災異多不能數奏惟歲終一上至公次其日月先後援引經史為證言甚懇至欲上下同加修省不事虛文上嘉納之尤嚴度僧道之禁以為近世弊事莫甚於此有言及者輒闕之既以政事為己任士大夫爭推重其才然所以取怨於人者亦多矣在南京吏部奉詔考覈諸司人服其公明無異議者以災異疊見率諸公卿條奏二十事如法祖宗謹好尚恤軍民選將帥積邊儲等事皆切於時

後復以清寧宮災再以二十八事上詔皆下諸司看詳行之公既有才具部事益簡人以為不足為竟改任自永樂間遷都于北每以武臣一人有重望者留後而以兵部尚書共事故其責任視他部為重人以公為宜一時武備修舉軍民倚重相戒不敢犯法留都肅然於是上知公果可大用始有吏部之命公居常則能鑒別人物一旦當銓選抑揚進退各當其才或言別白太過終當召怨公不恤曰吾知冢宰之職當如是若諸末務不

喜紛更日昃退歸私第若無事者當廷議凡軍民利病能究知其故正色侃侃言之衆亦惟公一言而定天下想望其風采方以吏部得人賀而公以疾不起矣年五十八疾革昏憤口喃喃猶及禦虜事蓋時邊報方急也索筆作書惟及朝政其狗國之心至死不已自幼事其父與繼母郭夫人能盡子道友愛諸弟不以異母間其恩意諸弟亦謹事之至于親戚故舊所以周卹之者尤至平生馭下雖嚴然未嘗妄笞辱一人故人望其外若

不可親其中心實厚也卒之日人莫不痛惜之上聞訃
震悼特贈榮祿大夫少保謚文毅公娶盧氏生一子天
繼娶袁氏無子以弟阜之子霽為後霽蒙恩授中書舍
人三弟阜登進士第今為工部郎中山闕澤中書舍
人寬與公同朝三十年同在翰林同侍春宮頗知公乃
因阜等之請為傳其平生藏于家論曰

國朝罷中書省專任六部治政事聖謨深遠超出前古
當時尤慎簡六部之長欲其練習庶務俾三歲更迭為

之後既不行有缺止於轉遷而已百餘年來政事舉息則存乎其人若其間或稍自振迅衆輒相顧而驚以為立異故東漢時在位者多清確謹畏循常襲故之人其弊必至取媚於時如胡伯始而後已如文毅公為人挺然任事不少顧忌其亦有大臣之風者哉

白康敏公家傳

公諱昂字廷儀姓白氏常之武進人也少入縣學學業精敏出同輩景泰丙子中鄉試明年天順丁丑遂登進

士第年始二十三耳時英宗初復位更新庶政重言官

之選明年擢公南京禮科給事中南京六科官不備設

其選尤重公初受職已有才名俄丁家艱甲申服滿改

刑科成化戊子轉左給事中辛卯進都給事中皆刑科

公以言責自任南京戶部尚書張鳳不法公劾奏鳳為

大臣不加之罪何以示戒有旨械至京已而釋之鳳雖

幸免而一時多公直憲宗初即位值北虜犯邊經筵輟

講公上言帝堯不以洪水之災而不明峻德太王不以

昆夷之侵而自殞厥問今日正皇上講學以為修德之助之時不宜宴安以隳聖德他日有黃霧之異又上言六事皆當世要務其尤切者曰謹命令以全大信謂陛下即位嘗詔罷貢獻矣而貢獻者不絕嘗罷織造矣而織造者自如嘗禁權豪不得中鹽矣勢要不得求地矣京城內外不得創造寺觀矣而皆不為衰止願守大信勿以親倖而易其度可也監察御史謝文祥以言事得罪不可測公率同列救之謂文祥所言雖狂妄然為御

史非出位而言且其心無他宜含容之以開言路疏入
文祥得降用其餘獻納者尚多然公務持重不屑屑以
小事論至於事干刑獄者得以叅駁亦不瑣瑣摘抉人
小疵故人皆稱公知大體而名益起壬辰擢應天府丞
京民苦差徭繁重多破家公至適署掌府事為定役法
人稱均平至今用其法不變乙未擢南京大理寺少卿
辛丑進南京都察院左僉都御史奉敕兼管操江仍巡
捕沿江盜賊時有劉通者與其黨操舟販鹽并行劫奪

出沒江海間勢熾甚公調士卒追捕至太倉分兵截其
要路知通窘迫示以威信諭以禍福謂如自首服許以
不死通知公長者遂挺身來歸叩頭感泣公戒諭已仍
縱之歸通即率其黨以降持械通至京凡脅從者悉釋
不問事平公復奏沿江要害守備等官遇有警當互相
應援又請降關防印記以便行事皆從之未幾陞本院
右副都御史尋掌院事丁未陞南京兵部左侍郎奉敕
修鳳陽皇陵并白塔壽春諸墳時當荒歉衆以興大役

不堪公均工節用勞心調度越二年功遂畢與初計省
其半以其餘財仍行賑卹民反獲濟今上之二年為弘
治己酉河決金龍口漕運多阻召公往治改戶部左侍
郎公奏南京兵部郎中婁性從行始至河南相度水勢
慮水復趨張秋發卒數萬自陽武封丘祥符蘭陽儀封
數縣築長堤捍之遂導河自中牟決口至尉氏下潁州
經塗山合淮水入海又修汴堤令高廣如一上樹萬柳
使不崩頽又浚宿洲古睢河入運道以分徐州之勢又

築蕭縣徐集等口以殺汴徐之勢又自魚臺歷德州至
吳橋修古河隄又自東平至興濟鑿小河十二道引水
入大清河及古黃河以入海河口各作石堰相水盈縮
以時啟閉於是河竟不為害而漕運獲濟公又見高郵
之甃社湖風浪倏作多覆舟或舟觸岸輒壞議即其東
一二里開複湖以避其患河成舟安行無險名其河曰
康濟人思公惠別名白公隄治水事竣改刑部侍郎辛
亥署掌都察院事遂陞右都御史嘗言風憲官為朝廷

耳目凡巡行一道當詢屬吏賢否之狀上于吏部及本院部院據其詞以行黜陟且以所上之虛實為御史之黜陟庶幾各得其實而人有所勸懲也又天下軍衛士卒消耗宜預覈尺籍之數畀清軍御史使按籍搜考以絕埋沒諸弊又天下奏報災傷荒稔反戾上不知國計之當儲下不知民隱之當卹由有司以其地濶遠可以欺謾之故宜令御史預遣人踏勘田土高下之則造為圖冊設有水旱可據此以蠲稅糧而里胥無所容其奸

也御史李興巡按陝西以酷刑處死無敢為言者公曰
興為吾屬豈可避嫌而不為一言乎乃率眾大臣上言
興之暴固可罪然非殺無罪者今以死處興設有故勘
故殺者又將何以加之奏上興得免死癸亥陞刑部尚
書公心素厚斷獄不苛嘗曰秋霜之肅何如春陽之和
乎數諭屬吏以人命至重尤當謹重獄故寬抑者既多
平反其可矜疑者亦多從未減每以律為萬世之法條
例為一時之宜今吏得為奸皆條例繁冗之故因詳定

為若干條奏上頒行內外而奸弊始少甲寅尚書一考

加太子少保戊午東宮出閣進太子太保積階至光祿

大夫勲至柱國以其官贈曾祖均禮祖思恭父珂竝光

祿大夫柱國太子太保刑部尚書曾祖妣錢氏祖妣蔣

氏妣鄭氏王氏竝贈一品夫人配蔣氏封一品夫人公

居官四十年勤勞不倦濟以精力事至輒辦及決大事

往往以從容數言裁定多不失正其待人氣溫色愉言

出如恐傷之下至輿阜有過未嘗輕加笞辱屬吏以公

事獲罪必為掩覆營救得免乃已人以急難來告如切於身所以排解之者尤盡其力故感其恩者不特鄉里親友而已公官三品時其弟昇早世以其遺孤垣奏為太學生嘗置義田立義學凡族人之貧而幼稚者以養以教皆得其所其厚於宗族又如此今上知公德寵遇甚厚屢有金織文綺之賜或病在告輒遣御醫診視并遣中貴人賜以酒饌等物庚申以星變再上疏引咎避位情甚懇切上不得已允之特進太子太傅致仕馳驛

而歸令有司舉優老之典仍賜璽書所以褒美之者尤重及行士大夫傾朝祖送人以為榮公三子竣圻坊皆孝預作園池以待公歸公至家日與親友極登臨游泛之樂入夜飲宴畧無衰憊之態於是蔣夫人年亦高矣與公偕老堂上旦夕子孫率諸婦羅列階下稱觴為壽大江之南論福履之厚無踰公者公卒年六十八上聞訃悼惜為輟視朝一日贈太保謚康敏遣有司諭祭者九仍命治葬於某處新塋惟白氏之先為河南人從宋

南渡占籍武進歲久為大族近代自公伯父瑜為禮科
給事中父珂為大冶教諭漸顯於時及公官益顯子弟
宗族奮起連取科第至數人皆為顯官諸孫又皆秀而
可望故鄉里論仕宦之盛又無踰白氏者論曰

世之登科第而進者累數百人莫不英偉踔厲言論風
生自以為一世不足為考其平生往往蹠齧顛蹶而止
求其後以功名富貴而終者特一二耳而此一二人者
觀其在位多寬綽厚重含垢納污不皦皦以自高不沾

沾而自喜渾然若無能之人曾不為新進少年之所與
孰知他日任重道遠以建國家大事者則此所謂無能
之人耳故嘗論常之先達若胡忠安公其一人也白公
起其後功名富貴考終於家與之畧等可不謂鉅人
者乎書曰必有忍乃其有濟有容德乃大公其人矣

家藏集卷五十九



總校官庶吉士 臣侍 朝

校對官主事 臣張 培

騰錄監生 臣周雲 翮

欽定四庫全書薈要

集部

家藏集卷

六十一

詳校官侯補通政司經歷臣郭祚職



欽定四庫全書薈要卷一萬六千七百八十九

集部

家藏集卷六十

明 吳寬 撰

墓誌銘八首

生壙誌一首

閻丘賓用墓誌銘



六年夏五賓用邁疾藥而愈愈而復作如是者數

四勢浸劇君知不可為即却藥俟絕言談如平時數日
死君嘗力疾築堂他日欲奉親讀書其中至是其父撫
楹大慟曰堂兒所築者曾不得一日居悲夫其殯于此

寬與君相好非直以表兄弟也亟往哭之且為之說曰
仁者不必壽世有是言君年四十三耳豈非信歟而又
言仁者必有後君娶妻更二三妾然生男輒天死徒有
三女子在此又何邪失之此者幸得之彼奈何君獨兩
失之邪豈所謂仁者君非其人邪君事父母甚力於其
有憂必致之樂乃已女兄贅于家生女復贅與之處歡
然人不知其家之三姓友人陳公輔死而家貧甚為之
歛且葬歲必一持酒肴祭墓下其行多此類謂君非仁

者疇諾哉然則君之致此吾無從考也前葬其甥周京
為狀乞銘予既為說以信其死而深疑其無後以傳乃
復叙次其事而銘之賓用字也諱觀姓閻丘氏蘇之長
洲人其先有諱孝終者宋元豐間仕至朝議大夫黃州
守曾祖叔莊祖公望父廷端皆不仕娶同縣徐氏生女
皆幼仲許適張裸君為人修謹好義是非取舍不肯苟
隨人尤慎交交則不變身雖混居市廛其高曠靜約榮
利漠然處山林者未必如也少好學長益喜習書攻詩

詩平實有理致所著有井蛙藁若干卷書得晉人筆意
君眇一目人謂其以疾故不仕非也年未四十髮已種
種嘗自怪其早衰然不意即死矣死之日為天順七年
閏月某日以又明年某月日從母顧氏柩葬天平山之
原於是其母先卒六月矣銘曰

生不壽死不後人之自取邪數之不偶也晉陸士衡唐
孟東野君兼其人于千載下我為之銘豈曰知者

南京福建道監察御史張君墓誌銘

於乎人惟無志與材以見于世而槁死林下死者固無憾生者亦不之惜也或有志鬱而獲信材闕而及試於是而死則死者生者亦何足憾且惜乎乃若吾友惟善之死志方信而條鬱材將試而卒闕此不惟惟善之目不瞑凡為其姻戚僚友莫不為之扼腕太息而流涕也君諱輔字惟善姓張氏其先為汴人隨宋南渡家于蘇遂為蘇之長洲人曾祖祐之祖士達父明遠皆不仕君弱冠入郡學即知黜華向實卓然出諸生治尚書景泰

四年中應天府鄉試三舉進士輒中乙牘得學官輒辭
不就居太學掃一室讀書朝暮齏鹽蕭然一寒士而君
益自刻厲久之從夏官卿掌奏疏居一歲謁選吏部考
君才可用奏理南京都察院刑六閱月刑無頗類都御
史高公才之以其名上成化二年三月即拜南京福建
道監察御史浹辰將取道還家為母吳夫人壽一夕暴
卒閏月乙亥也年四十一友人鄉貢進士查君文外兄
太常典簿李君浩相與殮之官為給舟載其柩還其兄

佐與其二子以四月庚子葬君于吳山先塋之次君為人謹謹不少放剛簡端慤而有廉隅善事親與人交篤而不汎配錢氏故大寧都司斷事某之女子男曰謨曰訓女長適朱存理次許適徐季華次尚幼自君初登貴仕即死不識者亦有噫嘻聲夫祿位庸者所待以為榮者也君之志固不在是矣子之所以惜君者亦果在是乎系之以銘曰

木產于地封之艱澑之不易尋斧縱馬垂成器飄風拔

之匪材自棄嗟嗟張君無乃類人不勝天奚足異

陳府君墓誌銘

陳氏故河南人宋南遷從之家于蘇遂為吳縣人世業
醫其陰有德于人蓋已久矣至君之兄少保僖敏公既
以重望曠度為天子寵任而君之弟鑄復以子貴封河
南道監察御史一時陳氏貴顯遂為吳中仕宦家之冠
君時處伯仲間畧不以門地驕人縮首斂足語出恂恂
其抑畏反居寒士下故鄉里稱厚德者必曰陳君陳君

云君諱錡字有容叔父季玉無子以父命為之後母朱氏老而無依嘗迎養于家君以其事父者事叔父而季玉之祀不絕以其事母者事外母而朱氏之意甚適也永樂初父被召為太醫院醫士君懼其老弗勝勞請以已代父之父沒居憂制以疾遂不上成化元年六月二十七日年六十七終曾祖德卿祖均錫父孟玉皆贈太子太保都察院左都御史曾祖妣某氏祖妣某氏妣高氏繼孫氏皆贈一品夫人娶夏氏繼劉氏子男五人倬

備佾似佩女二人長適莊信次許適傅奎孫男十二人
女四人以二年十二月二十二日葬吳山之先塋前葬
其弟御史君率倬等哭再拜持狀乞銘予於君為里人
頗知君不可辭無銘銘曰

於維陳氏世有潛德自汴徂吳久晦其蹟維僖敏公為
時名臣寵祿之來萃于一門小人施施孰不憑藉君方
退然自持愈下維葬有銘可考不誣以媿小人以慰諸
孤

山陰田處士墓誌銘

成化庚寅六月一日山陰田處士卒享年八十有三以
明年當卒之月日葬于邑亭山先塋之次初處士之疾
病也屬其子敬曰吾即死惟吾所輯喪儀是行百凡葬
具寧薄毋厚唯刻石誌墓古人所不廢者汝其圖之至
是敬使其甥吳璫走南京持狀謁予再拜以請予以不
知處士辭而監丞徐先生懇懇道處士之賢於予先生
處士之邑人也予信其言且嘉處士之能不亂其命而

其子之能從之也卒諾之按狀田之先蜀人也宋有諱奕者仕為右正言從高宗避金虜之難徙家臨安四世孫起居郎昭再徙會稽昭生榮榮生茂義茂義生忠始籍山陰而娶于朱生處士諱亨字時恭別號勿菴少侍奉其母得子道甚母沒哀毀踰禮人多稱之其治家尚嚴肅而尤以信義服其鄉鄉人有爭辯者待處士一言而定至於儉人悍夫望見處士於道皆為之趨避不暇或者比之王烈焉平居坐一室端然終日如對大賓

則有修敬之扁富而能貧服用貶損如小家謂奢之有害也則有貧富相因之圖雅好禮歲祀先必宿齋戒而儀物兩備患流俗之瀆其先也則有關紙錢之說其治喪斥去浮屠氏法而一惟儒者又以繁文末節之不足行也則有簡易喪儀之書他言之可書者尤多不能載故邑中推數好古而知禮者必及處士處士初歲績學期以表見于世既不果則一意治家正俗欲追古善士而及之逮其晚節益有高致作翠拱之樓以居彈琴

賦詩若無與於世者常偕里中遺老十人結清閒之會
月為一集蓋有洛社之遺風云處士元配楊氏繼王氏
子男一人即敬女二人適吳麟錢侃孫男三人曰阜曰
寅曰宣宣為郡庠生銘曰

有以禪乎世奚庸推而仕也有以傳於人奚庸愧乎死
也夷考其行於今之世而見古之士也嗚呼若人而今
則亡徒見亭山之下有封若堂也而采叢之麓秦望之
峯翩然白雲泠然清風彷彿乎覓氣之之乎其中也

正義處士墓誌

己丑歲予舉進士不第識烏傷王允達于國學予問允
達嘗所友者則首以浦江鄭仕信對且曰仕信以國子
家居且來矣其年冬予與允達偶出步真珠溪之許見
有騎而從兩僕來者允達遙指而笑曰此非吾所謂鄭
仕信耶趨而迎之果然仕信亦止騎從拂黃埃須眉間
執允達手語道上予亦願見仕信者見之一如平生歡
自是予三人者交好甚誦習暇輒相過從坐如鼎足然

他日任信獨過予予迓之門視其色若有隱憂者私怪之而難乎問有頃始起而言曰壘之父之棄諸孤歲星八周矣當下窆時墓石且礮而求其執筆者不得吾兄弟私計之以為寧緩勿苟恐為吾父羞茲壘獲投分于子能忘情於壘乎則應曰君之欲銘其先人意蓋在文筆也予念束髮時即嘗讀磨溪集集間他文辭之載弗暇論如沖素府君之葬晏朝請銘藍山府君之葬方承事銘青田府君之葬黃文獻銘奉議君貞孝處士則歐

陽文公宋太史亦皆有銘顧予何人而使與於斯恐不
獨羞先人且恐為諸先哲羞予方苦辭仕信耳若無聞
而首已至地矣予曰無已取事狀視遂出諸袖中蓋允
達所製也予疾讀一過曰君家家規百餘條先君子動
率與之合可謂賢子弟矣然在鄭氏則常日事也奚庸
書至飯饑殞死娶貧凡數十事可謂長者矣然亦鄭氏
常事也又奚庸書其非常事者惟曰正統間有寇難寇
退能修復舊業完其家者可書又曰天順初火起于家

以家廟顛天而熄及火復作廟卒無恙可書以二者可

書惜予文筆疎陋不能昭之闡之也若夫鄭自沖素以

下世德焯然史于國誌于郡乘于家者甚備又不假書

雖然君必欲書之敢弗書乃書曰明故正義處士諱旭

字允初曰正義者鄉之易名鄭本出滎陽累遷至浦江

之白麇溪天下所謂義門者也曾祖銘祖得金華稅令

父棟嫡母張母姚處士娶陳生四男瓌珣璠璿一女適

國子生戴廷用男孫七胄慶鑿鎬鏜錚鉞女孫三其二

適李鎮戴璠其一尚幼處士卒于天順甲申三月七日
春秋七十有四以歲之十二月六日葬其邑松林先塋
之右

解元賀君墓誌銘

始君自吳中來就試京師其狀貌羸然望之可驚予掃
一室使治其病數日病轉劇則為書報其家其兄慈冀
得一見也不一月疾馳四千里而來則君已死矣且死
神思愈清謂予曰吾不可以執筆為我書所以告吾父

者予諾之抵夜促書已具顧其子放姪收曰其善藏之
頃之脩然而逝嗚呼惜哉君諱恩字其榮姓賀氏其先
蜀人也後徙于吳曾祖公宣大理寺評事祖宗振父美
之皆業儒不仕母曰王氏自君為童子時用其父教力
學不少懈既游郡校治易得其義而止未嘗曲為之說
下筆平易謹密皆可誦也成化四年舉于鄉第一明年
例試禮部以病不果後凡三試輒屈然其業益精名益
完嘗入太學祭酒司業期待者甚至與同舍生講業皆

推讓之以為不可及家居學者爭集其門終日懇懇不厭指教去而取科第者凡若干人遂以易師稱吳中為人喜辯說是非無所徇于人人以其中無他也亦無怨惡之者至其事父兄孝友教子弟嚴而有法其可稱者多矣君初以兄之子放為子後得子曰改女一人皆幼其娶吳氏也生于正統己未七月十二日卒于成化癸卯十月三日年四十五其兄慈載其柩將以明年十月三日還葬于吳縣胥臺鄉黃山之先塋子固與君厚者不

能無一言以相其役也竊觀君之死公卿大夫雖不識
君者皆惜之其識者尤悲悼之所以得此于人者非以
君宜有爵位而不及致故邪然彼徒有之者而人方幸
其死則人寧得乎名邪得乎爵位邪况彼亦終死而同
歸于盡邪因書此以慰其父兄子弟之哀亦以自慰云
爾為之銘曰

抱美玉兮來售歷長路兮止息方握手兮勞苦倏舍予
兮誰即形慄慘兮覓茫茫藐二稚兮在吾側豈乘風而

反旆戀吳山以為宅嗟死者之紛紛奚名譽之藉藉惟
好修而有文宛其人兮如存才可用兮自致命在天兮
嘗聞君維安此兮無怨見臨絕之云云竊獨怪其不瞑
豈平生乖願乎榮親命無往而不在安斯壙兮尚永闕
乎千載

湖廣荊門州知州徐君墓誌銘

徐世家江陰之梧塍君之曾大父曰均平有隱德大父
曰本中嘗以人材徵未仕而沒後朝廷追旌其墓曰義

民父曰景南疎財尚義獲受官服其娶孔氏而君所生
母馬氏也君諱泰字士亨以避先諱更字大同幼與其
兄惟正受父訓學業不少縱惟正嘗一出為中書舍人
而君從鄉校貢入太學文名在六館間藉甚既乃應順
天府鄉試時主試則學士劉公儼也居君首選人以為
宜或有以私故獨謂所取士非公者請覆試于上不可
乃即禁中特試前列五人文成皆稱所第名而君尤以
富嫌於人其事益白於是士論翕然歸劉公至沒而得

謚文介亦以此其後再試禮部輒中式有司嫌君輒棄
去人爭惜之久而歷政憲臺以能明法律例有御史之
擢復以嫌不果竟授黃之羅田令初至官謂為政當先
足食否則教未可施乃數訓民務農凡貧無牛種者輒
給與之更立義倉以為儲蓄之計已而歲大祲遂發粟
賑民不足則下勸分之令且作餽粥以食羸弱不能行
者一時惠及鄰邑所全活不可勝計先時民多論財嫁
娶君禁之使必以時民有其後將絕以貧故出繼他姓

者為贖還其家富民買田或不納稅稅遺貧戶至六百

石有奇者徵迫殆死為發其弊得免君居官尤廉每斤

所當得公錢市粟以備饑歲其服食百需一取給於家

而已時有但飲羅田水之稱於是黃人爭欲得君守郡

兩司為具疏聞于朝遂擢知荆門然非黃人所望也去

任之日爭送之郊悽然不忍舍荆門號難治君治有餘

力州幾無事部使者才之會夷陵有疑獄數年矣乃檄

君往讞讞之即決其明敏如此三年有鳩來巢於廳事

之梁人以為善政所致相與歌之俄遭孔孺人喪歸再
遭父喪以生不能榮及其親為痛與其兄竭力治葬人
憐其孝服除荆門父老數輩詣闕奏願復得徐知州疏
下吏部從之君在任歷五月矻矻理弊政疾作即不可
治卒之日成化十五年十月丙午也年五十一君襟度
濶達遇義事敢為綽有父風與其兄處相友愛甚篤家
產故厚能身率族人以儉教子姪學必勤苦已而遂有
取科第者實自君啓之性善吟詠有生白生詩藁藏于

家主白者其所自號也君初娶同邑趙氏處士時顯之
女再娶海虞章氏國子助教儀之女男二曰元穀曰元
菽出側室王氏顧氏女五其壻曰華穎陸節周祥熊夏
黻夏珙至是君之喪歸自荆門卜卒後之三年正月壬
申葬于所居東三里許馬鎮村福昌里之原其兄惟正
以予嘗交君前葬具書以卜戶部之狀來請銘為之銘
曰

才莫不宜而止于斯古亦有言止或尼之嗟世之人多

以祿仕仕不以祿君也盡瘁簿書錢穀莫匪為民寧身
之誣而民之信豈徒誣焉又奪之年惟此銘文庶永其
傳

宿田翁生壙誌

成化丙午翁年六十有六曰吾老矣一旦即病不起何
如盍預備所以藏吾身者於是治棺棺成又曰盍預備
所以藏吾棺者於是治壙壙成又曰他日子孫必求誌
吾墓者其或失之誣乎則以書來京師請于予曰吾故

韓氏孤童也昔先祖院判府君遺命祖妣倪安人俾為伯父府君後時既幼無知識賴先母張孺人撫育之如已生而叔父府君更憐之稍長則為擇配以家世業醫也命從從兄梅窗先生學早夜肄習亦既勤矣蓋吾之於醫雖不能過人然於治病未嘗不盡吾心或不可治雖有厚利直謝却之使更他醫而已惟吾性稟介直與世多忤故兩以醫薦皆沮于人且愚不逆詐至于囊橐枵然此皆區區置之不足道也獨念吾母張孺人守節

歲久嘗言于有司蒙恩旌表以少酬所以撫育吾者他
如修祠堂必謹祀事以奉先世置墓田必立條約以示
後人此則不敢不勉焉者今而且老惟上下山水與名
人勝士杯酒嘯詠以韋布終其身焉吾有子曰金曩嘗
侍外舅張御醫先生于京師先生高於醫者得盡傳其
秘為知者薦授崇王府良醫而吾晚年卒賴其祿養比
又為吾入粟賑饑有章服之榮此固非吾所望然念其
孝不忍違也吾娶張氏能守婦道不幸先卒有子四人

長即金次鑿次蓋次鏊鏊庶出也女六人孫男若干人
女若干人張氏卒時以先墓在城西者隘始卜葬雅宜山
鳳字號而虛其右以俟吾今所治壙即其地也吾平生
大畧如此惟託斯文之雅及吾生存以一言記之幸甚
予與翁別又數年矣嘗見其年壯氣盛時好面折人過
論事侃侃無所畏忌及漸老癯然一醫更謹厚靜默可
親今得其書其言真率不妄如此視彼好自誇詡而考
其行無一副者豈不賢甚矣哉於是誌之韓之先出安

陽為宋魏國忠獻王之裔世有顯者至國初有曰復陽
先生始精於醫傳其子曰公望隱居不仕曰公茂公達
竝以醫事太宗文皇帝最見寵遇公達生三子曰伯濟
伯廣伯尚伯廣娶喻氏生翁而為伯濟後伯尚實教而
成立之其名襄字克贊宿田其別號也以求樂辛丑十
月九日生壙成於丙午某月某日明年七月十日誌

進士卞君墓誌銘

今年夏有傳寅之死者予不之信或曰子何以不信寅

之死予曰寅之淳謹人也無暴氣無刻行如是而又當
盛年固無死理曰無死理不有死命乎居數日有自南
來者曰寅之殮矣殯矣吾且臨其喪矣則歎曰噫嘻寅
之其果死於命耶方謀與諸同年為文祭之以寫其哀
而寅之之兄退之適遣使來京師持鄉進士翟舜民之
狀乞予銘墓且自為書遺予予既進使者問寅之之所
以病且死故既乃發其書考其狀而叙之曰寅之諱謹
姓卞氏常之武進人父曰庭蘭生六子寅之其次子也

為人蘭其清玉其潔而衣冠楚楚眉目如畫出入家庭
庠序間於父兄師友之情最深也父嘗以誣被拘寅之
憂甚日則躬操飲食進之獄中僮僕請代其勞不聽異
母兄諒蚤世家人少之謂喪禮宜殺寅之執益盡此皆
其幼時事為宗黨所稱道者既長益好學從良師受三
禮探索辨難專門禮經者不能屈至為程文務抑其詞
使與理稱成化七年以邑學生舉應天府秋試主司今
楊學士徐侍講爭奇其文擢魁其經八年春遂中禮部

試廷試復在高等天子賜之進士出身故事進士不即授政第使從有司觀之寅之得兵部謹飭如諸生名益起部中會有大臣死者朝命董葬事南行經齊魯時適東方大旱民餓疫者相枕藉寅之感焉行次房村疾大作兼程抵家見其母若兄弟疾少愈一日密召其弟詮譯等謂曰為我治棺衾皆怪之翼日竟不起九年五月五日也年甫二十九死之後發其篋得奏章一通言東方事宜所以區畫其荒政水利者甚備見者益悲其用

世之志云以明年二月十七日葬其先塋寅之娶徐氏
生一男二女卞為浙右名族予嘗為寅之誌其弟誠之
墓頗著其家世矣茲故不復載銘曰

膏其軸適于陸折其輶車則覆嗟哉寅之命何鞠

家藏集卷六十

欽定四庫全書薈要卷一萬六千七百九十

集部

家藏集卷六十一

明 吳寬 撰

墓誌銘一十首

壽藏銘一首

前朝列大夫國子祭酒陳公墓誌銘

今上之五年擢國子祭酒邢公為禮部侍郎而以翰林侍讀學士陳公代之公上疏辭不獲則就職一時僚屬生徒皆自以為得人公為人師莊重簡默於教條重改更特持成規御人度使可守而已至簿書錢穀之事一

付主者務攬大綱不瑣瑣問出入曰吾職不在是也故事國子師生月給錢若干為飲食費然以事去不及給者則貯為公錢用之蓋更數祭酒皆然至邢公繼之頗以法繩人人始有怨言及既擢去或欲誣其以公錢入己者且及公公置之殊不以為意事遂上聞詔大臣雜治邢公對簿力辨公歎曰吾官至國子師尊嚴矣安能對刀筆吏掉口舌乎不吐一詞竟服時適有從中醞釀之者獄詞上備皆坐除名於是諸生數百人詣闕上章

為公訴誣枉不報士論寃之其有志世道者則以朝廷
一旦辱二大臣去之如反覆手又為國體惜之也公既
免官家居言笑如昨日將治裝南還不幸而疾作矣遂
以七年九月乙酉卒于崇文街里第年五十七夫人錢
氏護柩歸葬吳縣伏龍山之先塋實九年二月壬申也
公諱鑑字緝熙世本嘉興商氏元季之亂曾大父賓避
地長洲之周莊冒氏陳大父諱某父諱潤贈翰林編修
公生方幼稚編修君謫戍蓋州道京師遺公故人范叔

瓚家稍長去從王太卿一居為老氏學非其志也然公

少有高資竊好儒家言能通其說下筆為文章輒有奇

氣他日以事如浙東市書盈篋而歸晝夜誦習卒棄其

學而歸於儒以其餘力治進士業正統九年中順天府

鄉試第二人明年禮部中乙榜不就入國子為李忠文

公弟子文名益起忠文奇之十三年中會試十八人廷

試擢第一甲第二人授翰林編修景泰元年代祀北鎮

醫巫閭山還充經筵講官七年遷修撰英宗復位奉使

朝鮮天順四年同考試禮部明年預修大明一統志尋
選充東宮講官六年主順天府鄉試丁母太孺人沈氏
憂服除遷侍讀修英宗實錄成進侍讀學士成化四年
主應天府鄉試明年奉詔教庶吉士翰林未幾國子之
命下矣公為人容貌岸然望之若不可親及就而聆其
言論藹如也人有善喜為之稱道其不善者亦疾之如
仇故卒以此得禍少罹患難家室蕩然能以孱弱自樹
立及登第得官而編修君沒戍所久矣間因東使代祀

便道函其父骨歸而逆母太孺人養之於官既而得旨
賜歸葬其父于鄉母子同入里門卒完其家室而加光
大之人以為難公事太孺人孝而盡禮太孺人卒居喪
三年不肉食不內處不酬應文事時朝廷方修實錄嚴
有詔起公公上章求終制不允章再上懇求允之平居
無聲色之好好止藏書并古書畫器物而已朝鮮嘗因
公來使以妓女侍公詩却之夷人敬歎至版刻其投贈
諸詩行于國中其為文才贍而氣完所著號方菴集凡

若干卷善筆札至臨模古人真蹟殆不可辨配錢氏封孺人賢而有內助功公無子子弟之子涑先卒三女長適湯壁次適范輪次許適邱某而天孫男一人曰祗公之葬蘇守鄱陽丘侯時雍實經紀之而墓銘顧未之刻寬則有罪焉蓋寬少游於公之門公不以其不肖每與進之今幸竊科第入翰林而公既不見則聞公之葬獨無一言以下慰於九泉乎為之銘曰

得喪糾紛有萬其狀自我得之或以人喪我力可為人

不可知終焉面目求無醜而公則其人進退甚適公議未亡則我藉籍此寃可置彼惜孔多歸全一丘其如公何

先考封儒林郎翰林院修撰府君墓誌

府君諱融字孟融姓吳氏蘇之長洲東吳上鄉人自高曾以來代有隱德父曰壽宗尤以淳篤稱生值元季逮國初能晦匿自全娶同邑韓氏年五十始生府君時洪武己卯二月甲寅也府君幼則端確兼多智識如鉅人

性至孝父嘗有疾以童子徒步入西山汲澗泉煮藥以
進稍長即善治生父曰吾晚得子而子能自立如此固
先世之德之致也喜而特祀告之府君既孤年甫十四
自顧無他兄弟卓然以門戶自任當是時所居城東遭
世多故隣之死徙者殆盡既荒落不可居乃徙今集祥
里依從母之夫顧執中氏顧方以貲雄里中久而家漸
衰執中且病呼府君告曰吾視諸子鮮克承家者吾即
死惟是舍字勿為他人有也府君泣而諾之及執中沒

府君厚與之直而仍居其子不使他適迄今蓋五十餘年府君既以勤儉謹畏拓其家以大而城東舊業然未嘗一日敢忘而不經理之晚歲益種樹結屋為終老之圖因自號東莊翁及孤寬忝科第入翰林為修撰獲以其官封府君階儒林郎然不幸命下則既遘病矣卒以成化乙未八月戊子年七十有七娶居氏繼張氏繼王氏皆封安人子男三曰宗曰寬曰宣女四適沈鏞周諤沈綬王節周氏女先卒孫男四曰奎曰濟曰奕曰福孫

女二長適夏靖先卒次許適徐美中曾孫男一曰俊章
女一以卒之年十二月甲申葬于吳縣五都太平鄉花
園山之先塋初寬居京師聞府君病凡再上章始賜歸
省未至家之七日而凶問至寬哀號悲恨痛徹心骨聲
容如存聞見無及日月有時敢次叙平生大畧刻石納
之幽堂若夫府君之德所以積于躬見于事庇于子孫
推及於親戚鄉黨者當求諸名筆表于墓道寬悲哀昏
憤不能悉書也嗚呼痛哉孤寬謹誌

奉議大夫宗人府經歷龐君墓誌銘

宗人府所設官有令有正皆極品然未嘗授其人常以駙馬都尉一人之尊貴者署其事其屬有經歷亦必有清望之士乃授蓋慎之也龐君朝儀以沔陽守滿考特擢為之君靜厚人也言動不躁且負才具足以有為始至府中覩解宇傾圮葺之如新人莫知其費之所出顧所掌自皇族譜牒冊籍之外更無所事又府署深遠終日寂然如山林間吏卒闔戶晝寢而君益閒散無以施

其才歲餘病作竟卒實成化二十二年十一月十九日
享年若干君諱珪字朝儀其先山西大同人曾祖福忠
謫戍北平又徙太倉故今為太倉人祖景仁考仲禮仲
禮娶某氏生君始遣君入衛學為儒生君能自奮勵以
天順某年遂登應天府鄉試既而試禮部輒不中始仕
為沔陽沔陽大州號難治惡少年往往白晝肆剽掠莫
敢何問君始至擒其首惡者一二治之餘皆斂蹟屬縣
景陵有巨奸相聚陰持吏短長起滅詞訟其黨有一太

歲十虎三彪之號亦皆就擒死獄中他日盜聚竹林灣
勢張甚捕者皆空還君出其不意以小舟直抵其巢穴
盜相顧驚曰太守來矣遂奔散獲二十餘人寘之法州
境遂寧巡撫都御史劉公敷持旌其功以勵衆州既稱
治君乃料戶口以均徭役作溝渠以備旱澇行之悉有
法至今人思之蓋君為州如此可不謂負才具足以有
為者耶君娶陸氏子男一人皚女三人孫男一人皚將
扶櫬南還卜卒之明年某月某日葬于太倉殷岡門外

以予嘗知君奉王翰林濟之之狀謁拜乞銘予以知君
晚為辭而體不舍也銘曰

位則不卑才無所施尚有遺愛與沔水東馳嗟君子兮
藏于斯

甌寧童府君墓誌銘

童為閩世家其先蓋出晉車騎將軍牧之至唐有避亂
由廣陵來者始居甌寧之西鄜鄉遂稱西鄜童氏在宋
曰蜚卿朱文公門人也著述甚富自是子孫以儒業相

承而族益大元末曰瑛者率鄉兵拒偽漢陳氏入國朝
論功授官瑛生文貞文貞生衡衡娶楊文敏公女弟生
府君少則醇良既長寡言慎行與物無忤事父祖與繼
母吳盡孝父沒事叔父而孝不替至與兄弟及諸子處
友愛慈厚家庭間盎然也童既大族君待其族人凡親
疎賢愚一以恩意其居鄉謙謹人皆愛重之或有忿爭
以一言諭之輒服歲饑出粟賑貸不責其必償其後朝
廷令有司行勸分之令君首奉詔始授承事郎非君所

望也君少好學而舅氏又貴顯于朝力足以薦人君時雖尚少然不肯依附以取仕宦教其子宜以科第出用子欽竟登鄉貢而君則不及見矣既七年欽赴試禮部始持其友滕行人祐之狀來乞銘且出其家乘一編相示則自唐宋以來至於國朝名人之文詞皆在予愧乎其請也顧欽之意懇懇乃為書其事行之際畀之刻于墓上君諱詡字士敏號恬齋以永樂丙申十月二十五日生成化辛丑四月二日卒享年六十娶吳氏先十二

年卒子男六人曰俞曰欽曰佐曰中曰康曰鉞女五人
長適朱熾次適朱燿皆文公十世孫次適建寧左衛指
揮張淵次適江楫孫男十人曰輔曰軌曰軌曰轍曰軾
曰輜曰晏曰誠曰策女九人以卒之年十一月二十六
日葬于其鄉泰山之原而銘之則丁未之三月十二日
也銘曰

閩有名族初則以儒視其篋中穰穰遺書問孰保茲惟
士敏甫其在里居亦不忤俯視其後人振振何多況也

有人已掇鄉科有施必報尚在他日藏茲山丘其固其密

鴻臚寺主簿何君墓誌銘

鴻臚寺主簿何君去其家十年以例乞歸省既得旨行至半道聞母孫氏喪哀痛不食者累日及抵家而疾作竟卒成化二十年十月十五日也享年五十七其子樟自太學亟歸將以明年十一月十三日葬君於泰興縣永豐之原謁予請銘予辭焉其請益至蓋既久始克為

之君諱嵩字與瞻姓何氏世為泰興人其先有諱某者以好義聞鄉里君之高祖也曾祖彥清祖伯舟父頓頓娶呂氏生君兄弟三人君最幼以父命為伯父顯子為人美風儀而績文學道汲汲如不及初不欲仕日之田間課農勤苦甚粟輒倍收然農事暇未嘗廢學也嘗至京師高文懿公以鄉里故與語竒之文懿時在館閣欲薦君可用力辭乃已既歸愈益敦行時都御史王公竝巡撫淮揚令南京兵部尚書王公恕為揚守二公世所

謂偉人相與論郡內士必及君他日兵部行縣遂造君之廬其見敬禮如此後君以事再入京師竟用知者薦授鴻臚寺序班秩滿陞主簿居官默默非所樂也君性孝友事所後父若母一如所生二兄相繼沒以痛哭故致疾其學務博覽尤熟於史上下數千載事能記憶不遺若佛老之教非特不信亦不一窺其說也然君平生惟不為奇絕可駭之行故其名譽不出於鄉而予亦不知君及觀當世二三名臣所以待君者則其為人可知

也且狀為進士儲君巵作儲固其鄉人也知君尤詳予特節而書之君娶張氏子男三人曰杰曰樟樟鄉貢進士曰楫楫後兄岳先七月卒曰楷出妾楊氏女二人李貴宗劉時其壻也孫男一女二銘曰

仕而食焉已升諸朝沒而殯焉不在于郊嗟哉何君名永昭

韓府儀賓曹公墓銘

維太祖高皇帝有子曰韓憲王王有子曰襄陵莊穆王

王有女曰清澗縣主主長而甚賢王竒愛之為擇佳配
公時年十六以從母之夫陳公傑為平涼守自吳中往
視之他日王適見公察其可妻也使人言于陳其夫婦
重違王意卒諾之已而資遣之入京誥授儀賓階亞中
大夫仍賜童服鞍馬而歸鄉人以為榮公諱珙字仲璜
姓曹氏世家蘇之吳縣為人俊偉豪爽無齷齪態人多
樂與之交然或不當其意雖顯要者亦蔑視之好面斥
人過尤能分辨曲直言出人亦無不服者身雖處富貴

未嘗一日忘其故土見吳人與語輒流涕而所以接遇之必厚以父母早世嘗迎其兄瑒事之甚謹兄沒撫其遺孤若已子然其平生蓋如此以成化十八年十二月十三日卒享年五十有七子男四人長銘為縣主出以軍功授官服次鉞次錡次銓女三人長適平涼衛千戶張英餘未行孫男二人長澄郡庠生次濶女四人於是銘來告哀朝廷為遣官賜祭將以卒之又明年甲辰十一月壬寅日葬于平涼縣由延里之原以予其郡人也

奉御醫周原已之狀泣拜請銘銘曰

孰謂吳產而為韓人造其中身生子長孫坐上雄豪灑
然襟度維不驕盈足以銘墓

亡弟原輝墓誌銘

嗚呼原輝果棄我而逝耶悲夫初原輝病少愈欲來京
師視予或止之不顧曰吾必一視吾兄竟來予見之驚
喜甚然竊憂焉留四月還相與痛哭而別至家僅五月
而病劇遂不可救蓋昔者不遠數千里而來其與我訣

別也悲夫原輝諱宣姓吳氏世家長洲為先修撰府君
之季子而吾之母弟也年十三母張安人不幸下世一
旦能自謹飭居家塾依予以學凡嬉游博奕之事皆無
所好也稍長每早作之城東經理舊業種樹成列鑿池
環之更築屋田間為農隱計題其旁室曰拙脩因號拙
脩居士而時舉杯歌晉唐人田園詩以自樂嘗曰吾有
憂慮惟入園林臨水石不知其脫然以去也性孝友能
順適父兄意先府君嘗館親黨之無依者數人至原輝

館之不替而長女兄寡居無子則迎養于家其仲早喪
生女纔數月亟取鞠之如已出一男曰遂尚幼更撫教
之至於長而成立其心之厚如此平生奉已食不求豐
衣不求華惟取足而已尤不自愛往往親為勞苦之事
與人處平和謙抑尊俎間相與勸酬飲輒盡醉醉則默
然不亂故人皆愛而親之其娶沈氏先卒有子一人曰
奕出側室顧氏女一人適徐美中其生正統三年十二
月十一日卒成化二十一年三月二十日年止四十八

以是年十二月十三日葬于吳縣太平鄉花園山先塋
之次子嘗與原輝約他日歸老必于東城而原輝亦曰
吾當益經理其地與吾兄樂也悲夫今尚何望哉葬既
有日吾何忍銘然亦不忍終無銘以暴白吾弟之為人
也銘曰

父兮母兮子於是依兮尚俟其後兮吾與子同歸兮

明故昭信校尉泰州守禦千戶所百戶胡君墓

誌銘

胡之先清江人也。在元有仕為萬戶者曰煥章。煥章生德淵。國初戍守盱眙。儀真等處為隊長。後徙泰州。生志學。志學娶劉氏。生君君諱倫。字大經。為人重厚明敏。且好學。畧通陰陽醫卜之說。而於九數尤精。少則在行伍。人皆為不樂。而君殊不以為意。曰：此吾世籍也。舊制凡戍江北者。歲更至京師。操備及君。即擐甲出門。衝冒霜雪。不以行役為難辭。如是者凡三十年。其小心守法。自裨將而上。皆信之。景泰初。北虜既遁。京師猶戒嚴。方務

儲粟塞下為守禦計慨然納粟六百石以例授試百戶
當是時君益欲以功名自奮遂從武平伯陳友往征逆
西得選置帳下以資謀畫師還實授百戶武平以君有
贊助勞擬再論奏不果人又為公不平而公亦不以為
意也既還泰州謂天下承平教其子必以文顯其子玉
竟登進士第列官于朝卒如其志君性孝侍父疾久而
不倦母孀居二十五年奉養備至及父母終居喪哀毀
而有禮其為人如此則所以稱於人者豈特才諳而已

以永樂甲午五月十日生成化乙巳十一月十七日卒
享年七十有二以明年某月某日葬于州西九里溝之
原娶薛氏懷慶知府廣之女先卒子男五長即玉禮部
儀制清吏司主事次璉襲百戶次瑄次珍次珙女二長
適許瑞先卒次適州學生李鑰孫男九曰嵩嶽巖餘未
名女九長適韓源餘尚幼儀制君將歸治葬自為狀來
請於予且曰玉忝以明經致用適與先人同品秩幸嘗
考最例不得封典甚恨願畀之銘以慰也予重違其請

乃諾而銘之曰

胡在故元實為武官厥既失之家幸以完公以才諳稍
自振拔賞不酬勞功簿孰閱未復于武卒顯于文甲科
儀曹畀其後昆維此幽堂百世無改追榮其先亦尚有
待

裕菴湯府君墓誌銘

湯府君以成化十七年正月廿二日卒既卜明年十月
廿五日葬于先塋矣其子瑄持御醫周原已之狀始來

乞銘其墓君諱潛字宗本自號裕菴翁其先常之江陰人也後徙於蘇遂為吳縣人世勤生殖家至府君之世而家始益大府君有兄弟八人其仕者曰渭他皆行貨于外府君亦嘗一至京師竟歸而治生于內蓋府君善殖產所以居積棄取得古人遺法然凡錢帛之出入估直之上下必公必平而其為人又剛直重厚素為人所信服當衆言交競徐出一言無不帖然以去其家既益大而居者甚衆衣食所資婚喪所需以及賦稅所出一

惟府君所區畫當是時其家出者率僮奴能協力化居而收倍蓰之息仕者有民社能守法奉公而有善最之名而府君於是乎有力於湯氏矣然府君至此自持益謹自奉益約兄弟子姪得於見聞者更相飭厲不敢為驕奢之習所謂禮生於有者及其既沒而族人始悲思之夫為市交易見於易牽車服賈著於書至司馬遷作史記特為白圭猗頓立傳蓋貨殖人生日用所不能已者推而言之其大者不可以為國使國之財賦得其人

而理之不惟可以足用而其效至於使民知禮節而俗厚矣府君曾祖曰潤卿祖曰均澤父曰善善以涓貴封大興縣知縣母曰楊氏封安人其配周氏繼徐氏王氏周出男二人曰琪曰瑄瑄以書藝進授鴻臚寺主簿女一人嫁浦文恭庶出女一人許嫁某孫男三人曰僕曰傅曰倫女二人一嫁朱延一在室府君享年六十有八其葬在吳縣太平鄉薦福山合周氏地銘曰

鬱然高丘是惟裕翁之墳嗟翁百年匪裕其身以殖其

家以垂其子孫何以為用惟其義何以為本惟其仁何
以知此吾其里人

醫師錢橘隱壽藏銘

并序

吳縣西三十里有雅宜山錢氏始葬山下者曰良王府
君橘隱則府君之仲子也其名愷字伯康自號橘隱錢
氏世業小兒醫其先為江都人在元有曰益者任常州
醫學教諭因家焉益生元善國初以名醫徵奉詔往治
晉王子疾愈王奏留之卒葬太原元善生宗道晉府良

醫正宗道生良玉太醫院醫士良玉娶高氏蘇州人也
再家于蘇故今為長洲人橘隱以永樂丙申十二月十
二日生自其蚤處已傳醫業然其氣豪爽不欲以醫名
居都下者數歲所交多名公奇士議論間發輒傾其坐
人歲已已適有胡虜之驚慨然歎曰吾生不能立功名
于時至於恻惜財物視軍興缺乏不少助之可乎乃市
馬若干疋上之以例被恩典之榮已而歸吳復歎曰吾
生無德澤及人惟醫吾家故業也盍終假是以施吾仁

乎始出治病治輒驗每旦啟門迎致者闐然而入其多
殆不能酬應而寡家子輒抱携而來纍纍于路不絕一
與論視而不責其必報其為醫善究病源而議論娓娓
足以發之所處方大率持重嘗曰壯夫尚欲固本况嬰
孺氣體脆弱可以峻急求乎至所治藥雖竒材貴品不
卹購求往往躬自修治不付他手蓋其精如此故其醫
益驗遂與其兄伯常院判齊名數十年來大江之南言
小兒醫者必曰錢氏其名浸聞中朝然橘隱既老不願

仕矣橘隱脩然長身而禮度雍容藹然有和氣少從故
禮部尚書楊公游已嘗親其德學中歲日與歸田諸老
登臨宴賞以極其樂蓋其好文尚禮則不以老而倦也
配王氏太原人世以武顯柔順溫裕稱賢宗族間子男
三人曰鋼先卒曰銳曰鉞女二人適陳倣莫益榮孫男
四人曰同文曰同倫曰同德曰同理女四人曾孫女一
人於是橘隱生七十年即雅宜先塋之次治壽藏為二
穴異日將并王氏葬焉工畢具書及廬山陳孟英先生

所述事狀來請曰幸及吾無恙時為之銘庶平生有所託而傳也予謂橘隱既不諱乎彼而復事乎此豈其猶不忘情乎死生之際耶竊惑之雖然曾子之啟手足亦欲門人知其平生而況即先人之旁異時奉其遺體而歸于是行不虧名不壞以見于地下豈特無毀傷而已是宜序而銘之銘曰

惟伯康父作此玄室鑿而築之既堅既密峯巒巖壑泉
水清漪自我先人已藏于斯世之熙熙人之怡怡尚百

歲後從而歸之

新淦縣丞顏君墓誌銘

成化丙戌春予憶赴君山游之招君迓之門甚恭命其
孫涇趣治具指山而游之君年老矣導客顧甚輕健始
登峯寧峰晚過何山飲僧舍歸宿其家詰朝飯畢與客
由支硎過禪關度西嶺萬松間遂入天平謁忠烈廟既
乃飲白雲泉扣大小石屋望龍門而歸仍宿其家益設
酒肴樂客予憊甚欲卧未得而君貌益恭氣益爽當是

時予竊窺見君之德而其壽考亦足以占之蓋歷十年
為乙未歲十月十二日而君終於正寢春秋七十有五
於是涇登進士第以嫡長而孤居憂于家咨其叔父所
以葬大父者累然衰服拜於門出其同年徐仲山所為
狀以墓銘請君諱璋字廷用姓顏氏其先傳自北徙吳
莫知其世曾祖均仕元為廉州知州祖仁平江路達魯
花赤父希誠母呂氏君娶卜氏繼顧氏子男三人曰鎡
早卒曰鎮曰鎰女四人適湯銘陳瑾顧榮其一在室孫

男三人曰涇曰渭曰深女四人曾孫男女各一人以卒
之明年十二月二十一日葬君子吳縣何山之原君少
以宦家子知學問稍長推擇為縣吏已能立名行縣中
人稱之及上吏曹給事如例授安福縣丞再歲丁外艱
服除改上饒俄又丁內艱服除改新淦在安福時縣有
豪猾數持吏短長及發民陰私以射利君始至知之召
置庭下數其罪遣去其人懼而止縣遂以寧新淦為江
西劇縣素號難治縣官率不久罷君有幹局愈以勤慎

自持仕竟滿考常掌二稅見民有鬻兒償官者歎曰此豈得已者乎吾為民父母而使民至此奚以我為遂以俸代償之自是益留意民隱其心之厚如此故所至去任民輒挽留之既去輒思之君縣丞既九載例得遷官曰吾獨不知止乎即具疏請致其事歸時年始六十云君歸日以教子孫為事或時循壟晦課農業與耕夫伍無嫌也因自稱稼軒老人性尤喜山水勝日尋佳處登臨游泛竟日忘返其樂有人所不及知者君偉儀觀美


鬚髯而莊重詳雅能起人敬才既不盡用世然晚見其
孫取科第貴顯于時論者謂其德澤之及後人者深且
長矣銘曰

維古發身不拘一隅在漢名臣刀筆簿書顏君之才與
崔子俱予不負丞而丞負予相彼小人有出無處以官
為家疇曰歸歟車攻維工孰始匪輿樂奏維瞽孰終匪
圉凡物且然而人弗如師峯之下有舊田廬奉身而退
庶保令譽昔所抱孫焜燿朝裾脩然考終世等敝帑孰

訃縣氓來挽喪車百世尸祝桐鄉之墟



家藏集卷六十一



總校官庶吉士臣侍朝

校對官主事臣張培

騰錄舉人臣吳壽朋